



Leasan 16: A' Ghobhar Ghlas

Ceit Dix à Beàrnaraigh ag innse sgeulachd do dh'Iain Peatarsan (Sgoil Eòlais na h-Alba)

Air a chlàradh ann an 1967

Faid: 00:02:41



<http://www.tobarandualchais.co.uk/fullrecord/43534>

Tar-sgrìobhadh

Ceit Dix (CD): Bha siud ann roimhe beathach ris an canadh iad a' Ghobhar Ghlas, agus b' fheudar dhi falbh dhan a' bhaile mhòr agus na h-iseanan òg aice fhàgail, no mar a their iad, na meann. Agus nuair a bha i a' falbh, chuir i snàithlean dearg 's snàithlean uaine agus snàithlean liath air a spògag bheag gus gum faiceadh iad i, 's thuir i: "Nis, na fosglaidh an doras gus an cuir mise mo spògag bheag fo bhonn na còmhlà, agus chì sibh gur mi a bhios ann."

Ach cha robh i fad sam bith air falbh nuair a bha am madadh-ruadh 's e cho seòlta, thàinig e chun an dorais agus thuir e: "Fosgail, fosgail, is mi do mhàthair. Fosgail, fosgail, is mi do mhàthair."

"Cuir do spògag bheag fo bhonn na còmhlà 's faithnichidh mise an tu mo mhàthair."

Chuir e a spòg a-staigh fo bhonn na còmhlà.

"Cha tu, cha tu, cha tu mo mhàthair. Cha tu, cha tu, cha tu mo mhàthair."

"Dè an comharra agaibh air do mhàthair? Dè an comharra agaibh air do mhàthair?"

"Tha snàithlean dearg 's snàithlean uaine 's snàithlean liath air spòg mo mhàthar."

Chaidh esan dhachaigh leis an t-seòltachd agus chuir e seo air a spòg, agus thill e agus chuir e... thuir e: "Fosgail, fosgail, is mi do mhàthair. Fosgail, fosgail, is mi do mhàthair."

"Cuir do spògag bheag fo bhonn na còmhlà 's faithnichidh mise an tu mo mhàthair."

Chuir e a spògag bheag 's bha na snàithleanan oirre.

"Is tu, is tu, is tu ar màthair. Is tu, is tu, is tu ar màthair."

Dh'fhalbh e le na trì iseanan bochd a bha sin, 's cha robh e fada nuair a thàinig a' Ghobhar Ghlas às a' bhaile mhòr. Cha robh sìon a' feitheamh a-staigh roimhpe.

Dh'fhalbh i gu bothan a' mhadaidh-ruaidh, 's thuirte i ris... thuirte e rithe: "Cò tha seo air mullach mo bhothain bhig chrùsgach chràsgail, nach leig goil dham choireachan 's nach leig bruich dham bhonnachan, 's nach leig le mo leanaban balgam dhen uisge a thoir thugam?"

"Tha mise seo, a' Ghobhar Ghlas, air a dhol às, ag iarraidh mo thrì minne mìne, am bocan tarbhaidh 's an gille-buic.

"Air an talamh a tha fom chasan, air an adhar a tha os mo chionn, 's air a' ghrian a chaidh seachad sìos, chan fhaca mise riamh do chuid mheann."

Ach mus robh a' ghobhar bhochd fad sam bith a' bruidhinn, leum trì coin air mullach a' bhothain aige 's leag e iad, agus leum na minn a-mach agus fhuair a' Ghobhar Ghlas iad, agus chaidh i gu toilichte dhachaigh leotha.

Iain Peatarsan (IP): 'S ann a-nise aig d' athair a chuala thu an sgeulachd sin?

CD: 'S ann. Aig m' athair a chuala mi i sin cuideachd.

IP: O uill, tha i glè mhath co-dhiù.